

欽定四庫提要

欽定四庫全書提要卷三十八

史部十二

時令類

歲時廣記

臣等謹案歲時廣記四卷宋陳元靚撰元靚不知其里貫自署曰廣寒仙裔而劉純作後序稱爲隱君子其始末亦未詳言莫之考也書前又有知無爲軍巢縣事朱鑑序一篇鑑乃朱子之孫即嘗輯詩傳遺說者後仕至湖廣總領元靚與之相識則理宗時人矣其書宋志不著錄惟見于錢曾讀書敏求記稱前列圖說分四時爲四卷今此本乃曹溶學海類編所載卷首並無圖說蓋傳鈔者佚之書中摭月令孝經緯三統歷諸書爲綱而以雜書所記涉于節序者按月分隸凡春令四十六條夏令五十條秋令三十二條冬令三十八條大抵爲啟筭應用而設故于稗官說部多所徵據而爾雅淮南諸書所載足資考據者反

多遺缺未可以稱善本特其于所引故典尙皆備錄全文詳記所出未失前人遺意與後來類書隨意刪竄者不同故並錄存之以備參考焉乾隆四十七年十月恭校上

御定月令輯要

臣等謹案月令輯要二十四卷圖說一卷康熙五十四年 聖祖仁皇帝御定大學士臣李光地等奉 勅纂校昔人以月令起義成書者指不勝屈李巨川采奇一編季有總序月有月令日有雜記而又附以五行生旺調攝占候諸說體例頗可觀采惜其書不傳是編因明臣馮應京戴任月令廣義刪蕪補闕別起義例凡所徵引首本經訓次及史傳下逮諸子百家方言地志靡不畢採用以課農時驗物候上可以資欽若而下可以訓作息固非徒觀縷歲華而已也乾隆四十七年十月恭校上

欽定四庫全書提要卷三十八

欽定四庫全書提要卷三十九

史部十三

地理類一

三輔黃圖

臣等謹案三輔黃圖六卷不著撰人名氏晁公武讀書志據所引劉昭續漢志注定爲梁陳間人作程大昌雍錄則謂晉灼所引黃圖多不見於今本而今本漸臺滄池高廟元始祭社稷儀皆明引舊圖知非晉灼之所見又據改槐里爲興平事在至德二載知爲唐肅宗以後人作其說較公武爲有據此本惟高廟一條不引舊圖滄池一條引舊圖而大昌未及其餘三條並同蓋即大昌所見之本偶誤滄池爲高廟也其書皆記長安古蹟間及周代靈臺靈囿諸事然以漢爲主亦間及河間日華宮梁曜華宮諸事而以京師爲主故稱三輔黃圖三輔者顏師古謂長安以東爲京兆長陵以北爲左馮翊渭城以西爲右扶風也

所紀宮殿苑囿之制條分縷析至爲詳備考古者恒所取資惟兼采西京雜記漢武故事諸僞書洞冥記拾遺記諸雜說愛博嗜奇轉失精核不免爲白璧微瑕耳乾隆四十七年十月恭校上

禁扁

臣等謹案禁扁五卷元王士點撰士點字繼志東平人是書凡爲目百一十有六篇一十有五釐爲自甲至戊五卷考何晏景福殿賦云爰有禁扁勒分翼張注引說文扁從戶册者署門戶也扁與編同此書詳載歷代宮殿門觀池館苑籞等名故取義於此卷首有歐陽元至順元年序虞集至順癸酉序皆以詳贍推之其中如釋東西箱以西清附之蓋本前漢司馬相如傳注謂西清即西箱也而其釋東西序則與東西箱別爲一類不知景福殿賦西箱踟躕以開宴東序重深而祕奧注西箱西序也東序東箱也本屬互文而析爲兩地則於宮室之制殊未能詳考又如釋秦雲陽宮一名林光一名甘泉考程大昌雍錄漢之

甘泉在渭北之雲陽秦之甘泉在渭南之鄠縣謂秦甘泉一名雲陽殊誤又孟康郊祀志注漢甘泉一名林光師古謂漢於秦林光宮旁別起甘泉宮謂漢甘泉一名林光亦非則於地理學亦不免偶疎至於秦祈年宮三輔黃圖以爲穆公作此書獨本漢書及水經注之說以爲作於惠公似非無見又若曲臺宮之類兼採雍錄以補黃圖之所遺頗可藉以參考末附名釋一篇訓詁亦極典核雖時有疎密要於史學不爲無補矣乾隆四十七年八月恭校上

元和郡縣志

臣等謹案元和郡縣志四十卷唐李吉甫撰吉甫字宏憲趙州贊皇人宰相栖筠之子以廕補左司禦率府倉曹參軍貞元初爲太常博士官至中書侍郎同中書門下平章事卒諡忠懿事迹具唐書本傳是書據宋洪邁跋稱爲元和八年所上然書中更置宥州一條乃在元和九年蓋其事爲吉甫所經畫故書成之後又自續入之也前有吉甫原序稱起京兆府盡隴右道凡四十七鎮成四

十卷每鎮皆圖在篇首冠于敘事之前並目錄兩卷共成四十二卷故名曰元和郡縣圖志後有淳熙二年程大昌跋稱圖已亡獨志存焉故陳振孫書錄解題惟稱元和郡縣志四十卷今此本闕第十九卷二十卷二十三卷二十四卷二十六卷三十六卷其第十八卷則闕其半二十五卷亦闕二頁又非宋本之舊矣篇目斷續頗難尋檢考水經注本四十卷至宋代佚其五卷故水名闕二十有一南宋刊板仍均配爲四十卷使相聯屬今用其例亦重編爲四十卷以便循覽仍注其所闕于卷中以存舊第其書唐志作五十四卷證以吉甫之原序蓋志之誤又案唐六典及新舊唐書地理志貞觀初分天下爲十道一關內道二河南道三河東道四河北道五山南道六隴右道七淮南道八江南道九劍南道十嶺南道此書移隴右道爲第十殆以中葉後陷沒吐蕃故退以爲殿至淮南一道在今本闕卷之中以唐志淮南道所屬諸州考之今本河南道內有所屬之申光二州列蔡州之後江南道內有所屬之蘄黃安三州列鄂沔二

州之後似乎傳寫之錯簡然考唐書方鎮表大歷十四年淮西節度使復治蔡州尋更號申光蔡節度使又永泰元年蘄黃二州隸鄂岳節度升鄂州都團練使爲觀察使增領岳蘄黃三州元和元年升鄂州觀察使爲武昌軍節度使增領安黃二州則申州光州嘗由淮南道割隸河南道蘄州安州黃州亦嘗由淮南道割隸江南道唐志偶失移併非今本錯亂也輿記圖經隋唐志所著錄者率散佚無存其傳于今者惟此書爲最古其體例亦爲最善後來雖遞相損益無能出其範圍今錄以冠地理總志之首著諸家祖述之所自焉乾隆四十七年五月恭校上

太平寰宇記

臣等謹案太平寰宇記一百九十二卷宋樂史撰史字正子官太常博士直史館事蹟具宋史文苑傳宋太宗時始平閩越并北漢史因合輿圖所隸考尋始末條分件繫以成此書始於東京迄於四裔然是時幽嬀營檀等十六州晉所

割以賂遼者實未入版圖史乃因賈耽十道志李吉甫元和郡縣志之舊概列其名蓋太宗置封樁庫翼復燕雲終身未嘗少置史亦預探其志載之於篇非無所因而漫錄也史進書序譏賈耽李吉甫爲漏缺故其書採摭繁富惟取賅博於列朝人物一一並登至於題詠古蹟若張祜金山詩之類亦皆並錄後來方志必列人物藝文者其體皆本於史蓋地理之書記載至是書而始詳體例亦至是書而大變然史書雖卷帙浩博而考據特爲精核要不得以末流冗雜追咎濫觴之源矣原本二百卷諸家藏本並多殘缺惟浙江汪氏進本闕佚較少今據以著錄文獻通考作太平寰宇志此本標題實作太平寰宇記諸書所引名亦兩岐今考史進書原序亦作記字則通考爲傳寫之誤不足據也乾隆四十七年五月恭校上

元豐九域志

臣等謹案元豐九域志十卷宋承議郎知制誥丹陽王存等奉勅撰存字敬仲

丹陽人登進士第調嘉興主簿歷官尙書右丞事蹟具宋史本傳初祥符中李宗諤王曾先後修九域圖至熙寧八年都官員外郎劉師旦以州縣名號多有改易奏乞重修乃命館閣校勘曾肇光祿丞李德芻刪定而以存總其事以舊書名圖而無繪事請改曰志迄元豐三年閏九月書成此本前有存等進書原序稱國朝以來州縣廢置與夫鎮戍城堡之名山澤虞衡之利前書所略則謹志之至於道里廣輪之數昔人罕得其詳今則一州之內首敘州封次及旁郡彼此互舉弗相混淆總二十三路京府四次府十州二百四十二軍三十七監四縣一千二百三十五離爲十卷王應麟稱其文見於曲阜集蓋曾肇之詞也其書始於四京終于省廢州軍及化外羈縻州凡州縣皆依路分隸首具赤畿望緊上中下之名次列地里次列戶口次列土貢每縣下又詳載鄉鎮而名山大川之目亦併見焉其於距京距府旁郡交錯四至八到之數縷析最詳深得古人辨方經野之意敘次亦簡潔有法趙與峕賓退錄尤稱其土貢一門備載

貢物之額數足資考核爲諸志之所不及自序所稱文直事核洵無愧其言矣其書最爲當世所重民間又有別本刊行內多古蹟一門故晁公武讀書後志有新舊九域志之目此爲明毛晉影鈔宋刻乃元豐間經進原本後藏徐乾學傳是樓中字畫清朗訛闕亦少惟佚其第十卷今以蘇州朱煥家鈔本補之仍首尾完具案張湜雲谷雜記稱南渡後閩中刊書不精如睦州宣和中始改嚴州而新刊九域志直改爲嚴州今檢此本內睦州之名尙未竄改則其出於北宋刻本可知矣乾隆四十七年四月恭校上

輿地廣記

臣等謹案輿地廣記三十八卷宋歐陽忞撰晁公武讀書志謂實無其人乃著書者所假託陳振孫書錄解題則以爲其書成於政和中忞歐陽修從孫以行名皆連心字爲據案此書非觸時忌何必隱名疑振孫之說爲是然修廬陵人而此本有忞自序乃自稱廣陵豈廣廬字形相近傳寫致訛歟其書前四卷先

敘歷代疆域提其綱要五卷以後乃列宋郡縣名體例特爲清析其前代州邑宋不能有如燕雲十六州之類者亦附各道之末名之曰化外州亦足資考證雖其時土宇狹隘不足括輿地之全而端委詳明較易尋覽亦地理家之佳本也乾隆四十七年十一月恭校上

方輿勝覽

臣等謹案方輿勝覽七十卷宋祝穆撰穆字和甫建陽人建寧府志載穆父康國從朱子居崇安穆少名丙與弟癸同受業于朱子宰執程元鳳蔡抗錄所著書以進除迪功郎爲興化軍涵江書院山長是書前有嘉熙己亥呂午序蓋成于理宗時所記分十七路各系所屬府州軍于下而以行在所臨安府爲首蓋中原隔絕久已不入輿圖所述者惟南渡疆域而已書中體例大抵于建置沿革疆域道里田賦戶口關塞險要他志乘所詳者皆在所略惟于名勝古蹟多所臚列而詩賦序記所載獨備蓋爲登臨題詠而設不爲考證而設名爲地理

記實則類書也然採摭頗富雖無裨于掌故而有益于文章摘藻採華恒所引用故雖非古體而操觚家不廢其書焉乾隆四十七年八月恭校上

明一統志

臣等謹案明一統志九十卷明吏部尙書兼翰林院學士李賢等奉勅撰初成祖嘗採天下郡縣圖經命儒臣纂集爲一書未及成而中輟英宗復辟後乃命賢等重編天順五年四月書成奏進賜名大明一統志御製序文冠其首鈐板頒行考輿志之書出自官撰者自唐元和郡縣志宋元豐域九志外惟元岳璘等所修大元一統志最稱繁博國史經籍志載其目爲一千卷今已散佚無傳雖永樂大典各韻中頗見其文而割裂叢碎又多漏脫不復能排比成帙惟浙江汪氏所獻書內尙存原刊本二卷頗可以考見其體製知明代修是書時其義例一仍元志之舊故書名亦沿用之其時纂修諸臣旣不出一手舛錯牴牾疎謬尤甚如以唐臨朐爲漢縣遼無章宗而以爲陵在三河金宣宗葬大梁而

以爲陵在房山以漢濟北王興居爲東漢名宦以箕子所封之朝鮮爲在永平境內俱乖誤不合極爲顧炎武所譏至所摘王安石處州學記地最曠大山長谷荒之語則併句讀而不通此本內多及嘉靖隆慶時所建置蓋後人已有續入亦不盡出天順之舊我國家辨方定位首重輿圖大清一統志近復奉詔重修起例發凡彌臻盡善此書之舛略本無可採特是職方圖籍爲有國之常經歷朝俱有成編不容至明而獨缺故仍錄存之以備一代之掌故焉乾隆四十七年三月恭校上

欽定大清一統志

臣等謹案 欽定大清一統志四百二十四卷乾隆二十九年奉 勅撰是書初于乾隆八年纂輯成書每省皆先立統部冠以圖表首分野次建置沿革次形勢次職官次戶口次田賦次名宦皆統括一省者也其諸府及直隸州又各立一表所屬諸縣系焉皆首分野次建置沿革次形勢次風俗次城池次學校

次戶口次田賦次山川次古蹟次關隘次津梁次隄堰次陵墓次寺觀次名宦
次人物次流寓次列女次仙釋次土產各分二十一門共成三百四十二卷而
外藩及朝貢諸國別附錄焉迨至乾隆二十年 天威震疊平定伊犁拓地二
萬餘里爲自古輿圖所未紀而府州縣之分併改隸及職官之增減移駐亦多
與舊制異同乃 特詔重修定爲此本嗣乾隆二十八年西域愛烏罕霍罕啟
齊玉蘇烏爾根齊諸回部滇南整欠景海諸土目咸相繼內附乾隆四十年又
討定兩金州開屯列戍益廣幅員因並載入簡編以昭大同之 盛軌蓋版圖
廓于前而蒐羅彌博門目仍其舊而體例加詳一展卷而九州之底屬八極之
會同皆可得諸指掌間矣昔唐分天下爲十道隴右道本居第六李吉甫元和
郡縣志乃退列爲第十以其地已入吐蕃故也宋之疆域最狹歐陽忞輿地廣
記于所不能有者別立化外州名已爲巧飾至祝穆方輿勝覽則併淮北亦不
及一字矣蓋衰弱之朝土宇日蹙故記載不得不日減 聖明之世版章日擴

故編摩亦不得不日增今志距 詔修舊志之時僅數十載而職方所載已非舊志所能該 威德遐宣響從景附茲其明驗矣虞舜益地之圖僅區九州爲十二又何足與 昭代比隆哉乾隆五十四年正月恭校上

吳郡圖經續記

臣等謹案吳郡圖經續記三卷宋朱長文撰長文字伯原蘇州人官祕書省正字樞密院編修書成于元豐七年上卷分封域城邑戶口坊市物產風俗門名學校州宅南園倉務海道亭館牧守人物十五門中卷分橋梁祠廟宮觀寺院山水六門下卷分治水往迹園第冢墓碑碣事志雜錄七門首有長文自序一篇末有後序四篇一爲元祐元年常安民作一爲元祐七年林處作一爲元符二年祝安上作一爲紹興四年孫祐作州郡志書五代以前無聞北宋以來未有古于是記者矣長文自序稱古今文章別爲吳門總集書中亦屢言某文見總集今其書已不傳是記蓋亦幸而僅存者也乾隆四十七年九月恭校上

乾道臨安志

臣等謹案乾道臨安志三卷宋右文殿修撰知臨安府周淙撰臨安自南渡後建爲行都淙於乾道五年再任杭帥始創爲此志凡十五卷見於宋史藝文志其後淳祐間施鏐咸淳間潛說友歷事編纂皆有成書今惟潛志尙存鈔帙周施二志世久無傳此本爲杭州孫仰曾家所藏宋槧本卷首但題曰臨安志而中間稱高宗爲光堯太上皇帝孝宗爲今上紀牧守至淙而止其爲乾道志無疑惜其自第四卷以下俱已缺佚所存者僅什之一二也第一卷紀宮闕官署題作行在所以別於郡志體例最善後潛志實遵用之二卷分沿革星野風俗州境城社戶口廨舍學校科舉軍營坊市界分橋梁物產土貢稅賦倉場館驛等諸子目而以亭臺樓觀閣軒附其後敍錄簡括深有體要三卷紀自三國吳至宋乾道中諸牧守詳略皆極得宜淙字彥廣湖州人其尹京時撈湖浚渠頗著政績故所著述亦具有條理今其書雖殘缺不完而在南宋地志中實爲最